

神異典第一百四卷

佛經部紀事二

梁書高祖本紀高祖篤信正法尤長釋典製涅槃盤大品淨名三慧諸經義記復數百卷聽覽餘閑卽於重雲殿及同泰寺講說名僧碩學四部聽衆常萬餘人

劉勰傳勰字彥和東莞莒人祖靈真宋司空秀之弟也父尚越騎校尉勰早孤篤志好學家貧不婚娶依沙門僧祐與之居處積十餘年遂博通經論因區別部類錄而序之今定林寺經藏勰所定也劉慧斐傳慧斐明釋典工篆隸在山手寫佛經二千餘卷常所誦者百餘卷晝夜行道孜孜不怠遠近欽慕之論者云自達法師沒後將二百年始有張劉之盛矣

劉霽傳霽母明氏寢疾霽年已五十衣不解帶者七旬誦觀世音經數至萬遍夜因感夢見一僧謂曰夫人算盡君精誠篤至當相爲申延後六十餘日乃亡

法苑珠林梁有廣州南海郡人何規以歲次協洽月呂黃鍾天監十四年十月二十三日採藥于豫章胡翼山幸非放子逐臣乃類尋仙招隱登峯十所里屑若有來將循曲陌先限清澗或如止水乍

有潔流方從揭厲且就褰攬未濟之間忽不自覺見澗之西隅有一長者語規勿渡規于時卽留其
人面色正青徒跣捨屨年可八九十面已皺斂鬚長五六寸髭半於鬢耳過于眉眉皆下被眉之長
毛長二三寸隨風相靡脣色甚赤語響而清手爪正黃指毛亦長二三寸著布帔下赭有泥洹僧手
提書一卷遙投與規規卽奉持望禮三拜語規可以此經與建安王兼言王之姓字此經若至宜作
三七日慶齋若不曉齋法可問下林寺副公副法師者戒行精苦恬憺無爲遺嗜欲等豪賤蔬藿自
充禪寂無意此長者言畢便去行十餘步間忽然不覩規開示卷內題名爲慧印三昧經經旨以至
極法身無相爲體理出百非義逾名相寂同法相妙等真如言其慧照此理有若全印心冥凝寂故
以三昧爲名

金剛持驗梁天監中有琰法師居長安招提寺年十一出家偶同寺僧往相士家相士謂琰曰可惜
聰明止十八歲耳琰聞不樂歸詣藏經殿焚香禮佛願賜經一卷畢世受持隨手於藏函內抽得金
剛經晝夜持誦忽一日更深房中有五色光明須臾見一梵僧身長丈五許語琰曰汝壽十八當亡
以真誠持大乘經力增延矣言訖不見琰年踰十九復遇相士愕然曰吾師天相全消何修至此琰

曰專心持念金剛經相士曰師壽當至九十二矣屆期坐化異香滿室

法華持驗梁雲光法師未詳姓氏普通二年詔于內殿講法華經天雨寶華天監中帝以亢陽問誌公公曰雲能致雨帝因請講法華至其澤普洽雨即大霑高下霑足

梁釋道琳山陰人有戒行

善法華涅槃吳國張緒禮事之天監中居富陽泉林寺寺有鬼怪師至鬼即銷滅弟子慧韶爲屋所

壓頭陷入胸師爲誦法華經禱之韶夜夢兩胡道人拔出其頭旦遂平復衆咸服其神感

梁釋

法懷姓嚴枝江人出家玉泉山寺常誦法華分衛一食不臥常坐荷錫遠遊廬峯台頂衡嶺羅浮無遠不屆棲息窮巖一志禪定嘗往岱嶽過徐州縣令問以公驗師止齋得法華一函令怒而閉之七日不食誦經聲不徹令感惡夢便頂禮悔過後還幽棲以禪誦爲業卒時異香繽紛旬日乃歇

法苑珠林梁鍾山開善寺沙門智藏俗姓顧氏吳郡吳人也有聖姥工相人爲記吉凶百不失一謂藏曰法師聰辯蓋世天下流名但恨年命不長可至三十一矣時年二十有九聞斯促報於是講解頓息竭誠修道發大誓願不出寺門遂探經藏得金剛般若受持讀誦畢命奉之至所厄暮年以香湯洗浴淨室誦經以待死至俄而聞空中聲曰善男子汝往年三十一者是報盡期由般若經力得

倍壽矣藏後出山試過前相者乃大驚起曰何因尙在世也前見短壽之相今年一事無沙門誠告可相矣藏問今得至幾答曰色相貴法年六十餘藏曰五十爲命已爲不夭況復過也乃以由緣告之相者欣然敬伏後記畢壽于是江左道俗誦此經多有徵瑞因藏通感矣以普通三年九月十五日卒于本寺春秋六十有五

無錫縣志釋法超邑孟氏子年十一出家住靈根寺修習經論雅有深思武帝勅爲都邑僧正命徧尋戒檢網羅衆部撰出要律儀普通六年講律平等殿帝臨坐聽受三旬而竟七年冬卒勅有司葬於鍾山開善寺墓

法華持驗梁甄元成中山人博達經史爲簡文所知以錄事參軍隨蕭管鎮襄陽因江陵甲兵殷盛密書申款或以告管管深信佛法矢願不殺誦法華者元成素誦法華以此獲免管後見之常曰甄公好得法華經力 陳南嶽尊者慧思武津李氏子幼持戒頂禮法華致忘寢息因久雨蒸濕身患浮腫忍心向經尋卽痊愈

魏書崔浩傳浩非毀佛法而妻郭氏敬好釋典時時讀誦浩怒取而焚之捐灰于廁中及浩幽執置

之檻內送于城南使衛士數十人浸其上呼聲嗷嗷聞于行路自宰司之被戮辱未有如浩者世皆以爲報應之驗也

趙柔傳隴西王源賀採佛經幽旨作祇洹精舍圖偈六卷柔爲之注解咸得理衷爲當時僞僧所欽味焉又憑立銘讚頗行于世

孫惠蔚傳惠蔚先單名蔚正始中侍講禁內夜論佛經有愜帝旨詔使加惠號惠蔚法師焉

盧景裕傳景裕好釋氏通其大義天竺胡沙門道惔每譯諸經論輒託景裕爲之序景裕之敗也繫晉陽獄至心誦經枷鎖自脫是時又有人負辜當死夢沙門教講經覺時如所夢嘿誦千遍臨刑刀折主者以聞赦之此經遂行于世號曰高王觀世音

釋老志熙平元年詔遣沙門惠生使西域採諸經律正光三年冬還京師所得經論一百七十部行于世

洛陽伽藍記白馬寺漢明帝所立也佛入中國之始寺在西陽門外三里御道南帝夢金人長丈六項皆日月光明胡神號曰佛遣使向西域求之乃得經像焉時白馬負經而來因以爲名明帝崩起

祇洹于陵上自此以後百姓蒙上或作浮圖焉寺上經函至今猶存常燒香供養之經函時放光明耀于堂宇是以道俗禮敬之如仰真容 聞義里有燉煌人宋雲宅與惠生向西域取經凡得一

百七十部皆是大乘妙典

法苑珠林後魏末齊州釋志湛者住太山北窰谷中衡草寺省事少言人鳥不亂恆誦法華經將終時神僧寶誌謂梁武帝曰北方衡草寺須陀聖僧今日滅度湛之亡也無惱而化兩手各舒一指有梵僧云斯初果人也還葬山中後發看之惟舌如故衆爲立塔表焉 後魏范陽五侯寺僧失

其名誦法華爲常業初死權殮隄下後改葬骸骨並枯唯舌不壞雍州有僧誦法華隱白鹿山感一童子供給及死置尸巖下餘骸並枯唯舌不朽

冥祥記東魏孫敬德天平中定州募士奉釋教嘗造觀音像自加禮敬後爲劫賊所引不勝拷楚忽夢一沙門令誦救生觀世音千遍執縛臨刑誦念數滿刀自折爲三段膚頸不傷三易其刀終折如故所司以狀奏聞丞相高歡表請免死及歸觀其家觀音像項有刀迹三敕寫其經布於世今謂王觀世音經自晉宋梁陳秦趙國觀音地藏彌勒陀稱名念誦得救者不可勝紀

佛祖統紀孝靜帝天平元年洛州刺史韓賢素不信佛白馬寺有漢明帝時經函時放光明世藏爲寶賢往寺斫破之未幾州人韓木蘭作亂一賊自屍中起以刀斫賢脛斷而死人謂毀函之報若是其速

北齊書斛律羌舉傳代人劉世清祖拔魏燕州刺史父魏金紫光祿大夫世清武平末侍中開府儀同三司任遇與孝卿相亞情性甚整周慎謹密在孝卿之右能通四夷語爲當時第一後主命世清作突厥語翻涅槃經以遺突厥可汗勅中書侍郎李德林爲其序世清隋開皇中卒於開府親衛驃騎將軍

法苑珠林齊太原釋慧寶氏族未詳誦經得二百卷德優先達時共知聞以齊武平三年從井向鄴行達艾州失道尋逕入山暮宿巖下室似人屋迴無所見寶端坐室前上觀松樹見有橫枝懸磬去地丈餘夜至二更有人身服草衣從外而至口云此中何爲有俗氣寶卽具述設敬與共言議問寶云卽今何姓統國答曰姓高氏號齊國寶問曰尊師山居早晚曰吾後漢時來長老得何經業寶恃已誦博頗以自矜山僧曰修道者未應如此欲聞何經爲誦之寶曰樂聞華嚴僧卽少時誦之便度

聲韻諧暢非世所聞更令誦餘經率皆如此寶驚歎曰何因大部經文倏然卽度報曰汝是有作心我是無作心夫忘懷于萬物者彼我自得矣寶知爲異人也求哀乞住山僧曰國中利養召汝何能自安且汝情累未遣住亦無補至曉捨去寶返尋行跡不知去處

周祖滅法經籍從灰以後年中忽見空中如菌大者有五六飛上空中極目不見全爲一段隨風飄飄上下朝宰立望不測是何久乃翻下墮上土牆視乃是大品經之十三卷

周書張元傳元年十六其祖喪明三年元恆憂泣晝夜讀佛經禮拜以祈福祐後讀藥師經見盲者得視之言遂請七僧然七燈七日七夜轉藥師經行道每言天人師乎元爲孫不孝使祖喪明今以燈光普施法界願祖目見明元求代闍如此經七日其夜夢見一老公以金針治其祖目謂元曰勿悲憂也三日之後汝祖目必差元于夢中喜躍遂卽驚覺乃遍告家人居三日祖果目明其後祖臥疾再周元恆隨祖所食多少衣冠不解旦夕扶持及祖歿號踴絕而復蘇

法苑珠林隋開皇十一年大府寺丞趙文昌忽暴卒唯心上微煖家人不敢斂後復活說云吾初死有人引至閻羅王所王問曰汝一生已來作何福業昌答云家貧無力可營功德唯專心持誦金剛

般若經王聞語合掌低首讚言善哉汝既持般若功德甚大王卽使人引文昌向經藏內取金剛般若經文昌向西行五六里見數十間屋甚華麗其中經典遍滿金軸寶帙莊飾精好文昌合掌閉目信手抽出一卷開看乃是金剛般若文昌捧至王所令一人執卷在西文昌東立面經讀誦一字不遺王大歡喜卽放昌還家令引文昌從南門出至門首見周武帝在門側房內著三重鉗鎖喚昌云汝是我本國人暫來至此要與汝語文昌卽拜之帝曰汝識我否文昌答云臣昔宿衛陛下武帝云卿旣是我舊臣今還家爲吾向隋皇帝說吾諸罪並欲辯了唯滅佛法罪重未可得免望與吾營少功德冀茲福祐得離地獄昌受辭而行及出南門見一大糞坑中有人頭髮上出昌問之引人答云此是秦將白起壽禁於此罪猶未了昌至家得活遂以其事上奏帝令天下出口錢爲周武帝轉金剛般若經設大供三日

三寶感通錄隋開皇中蔣州人嚴恭者於郭下造精舍寫法華經清淨供養若紙若筆必以淨心不行欺詐信心而與不行乞覓隨得便營如法經給書生歡喜嘗有十人道俗送直恭親檢校勞不告倦嘗有人從貸經錢一萬恭不獲已與之貸者得錢船載中覆錢失人活是日恭入錢庫見一萬錢

濕如水洗怪之後見所貸錢人方知其沒溺又有商人至鄰亭湖祭神上物夜夢神云倩君以物送與嚴恭寫法華經用也及覺所上之物在前又恭曾至市買紙少錢忽有人持二千錢授恭曰助君買紙言已不見又有漁人夜見江中火焰焰浮來以船迎之乃是經函及明尋視乃是嚴家經其後發願略云無一字而不經眼無一字而不用心及大業末子孫猶傳經業羣盜相約不入其里里人賴之至今故業猶爾云

報應記隋蒯武安蔡州人有巨力善弓矢常射大蟲會嵩山南爲暴甚往射之漸至深山忽有異物如猪人手開大蟲皮冒武安身上因推落澗下及起已爲大蟲矣惶怖震駭莫知所爲忽聞鐘聲知是僧居住求救果見一僧念金剛經卽閉目俯伏其僧以手摩頭忽爆炸巨聲頭已破矣武安乃從中出卽具述前事又撫其背隨手而開旣出全身衣服盡在有少大蟲毛蓋先炙瘡之所粘也從此遂出家專持金剛經 睦彥通隋人精持金剛經日課十遍李密盜起彥通宰武牢邑人欲殺之以應義旗彥通先知之遂投城下賊拔刀以逐之前至深澗迫急躍入如有人接右臂置盤石上都無傷處空中有言曰汝爲念經所致因得還家所接之臂有奇香之氣經日不滅後位至方伯九十

餘終

隋杜之亮仁壽中爲漢王諒府叅軍後諒於并州舉兵反敗亮與僚屬皆繫獄亮惶懼日夜涕泣忽夜夢一僧曰汝但念誦金剛經卽此厄可度至曉卽取經專誠習念及主者並引就戮亮身在其中唱者皆死唯無亮姓名主典之者皆坐罰俄而會赦得免顯慶中卒于黃州刺史

慕

容文策隋人常持金剛經不吃酒肉大業七年暴卒三日復活云初見二鬼把文牒追至一城門頗極巖峻入行四五里見有宮殿羽衛王當殿坐僧道四夷不可勝數使者入見文策最在後一問在生作善作惡東西令立乃唱策名問曰作何善對曰小來持金剛經王聞合掌嘆曰功德甚大且放還忽見二僧執火引策卽捉袈裟角問之僧云緣公持經故來相衛可隨燭行遂出城門僧曰汝知地獄處否指一大城門曰此是也策不忍看求速去二僧卽領至道有一橫垣塞路僧以錫扣之卽開云可從此去遂活

蕭瑀梁武帝元孫梁王歸之子梁滅入隋仕至中書令封宋國公女煬帝皇后薦信佛法常持金剛經議伐高麗不合旨上大怒與賀若弼高穎同禁欲寘于法瑀就其所八日念金剛經七百遍明日桎梏忽自脫守者失色復爲著至殿前獨宿瑀二人卽重罰因著般若經靈驗一十八條乃造寶塔貯經檀香爲之高三尺感一鎬石像忽在庭中奉安塔中獲舍利百粒

貞觀十一年見普賢菩薩冉冉向西而去

法苑珠林邢州司馬柳儉隋大業十年任岐州岐陽宮監義寧元年坐誣枉繫大理寺儉至心誦金剛般若經有兩紙未通不覺眠睡夢一婆羅門僧報云檀越宜誦經令遍卽應得出儉忽寤勤誦不懈經二日忽有敕喚就朝堂放免又儉別時夜誦經至三更忽聞有異香散漫滿宅至曉不絕蓋感應所致也儉至終計誦經得五千餘遍

法華持驗隋益州招提寺釋慧恭與同學僧慧遠結契後遊荆揚訪道而歸契闊三十年夜話次遠語如流師默無所對遠曰仁者無所得耶師曰性闇無解遠曰何不誦一經乎師曰惟誦法華普門品一卷當爲誦之但至心聽乃結壇升高座始發聲唱經題覺有香氣久之聞天樂振空雨花零亂經已方歇遠敬禮謝之

隋釋法朗南陽許氏棲止無定多住鄂州時誦讀諸經志專法華潔誓誦之一坐七遍如是良久聲如雷動遠近亮徹世因目爲法華朗焉有比丘尼爲鬼所著超悟元解莫不稱爲聰悟師曰此邪鬼也厲聲呵之魅卽怖去霍然如失

隋雍州釋法喜襄陽李氏七歲出俗志持法華仁壽中住京師禪定寺欲冥祈靈爽誓誦蓮經千遍因不止舊室巡繞梵誦數滿八

百誓心不散同寺僧忽見有寶車瓔珞入師房內迫而觀之了無所睹方知幽通之感

法苑珠林隋鄜州寶室寺沙門法藏戒行精淳爲性質直至隋開皇十三年於洛交縣韋川城造寺一所佛殿精妙僧房華麗靈像旖華並皆修滿至大業五年奉勅融併寺塔送州大寺有破壞者藏師並更修補造堂安置兼造一切經已寫八百卷恐本州無好手紙筆故就京城舊月愛寺寫至武德二年閏二月內身患二十餘日乃見一人身著青衣好服在高閣上手把經卷告法藏示你立身已來雖大造功德悉皆精妙唯有少分互用三寶物得罪無量我今把者卽是金剛般若汝能自造一卷令汝所用三寶之物得罪悉滅藏師於時應聲卽答言造藏師雖寫餘經未寫金剛般若但願病瘥不敢違命旣能覺悟弟子更無餘物唯有三衣瓶鉢偏袒祇支等皆悉捨付大德及諸弟子並造般若得一百卷未經三五日臨欲捨命具見阿彌陀佛來迎由經威力得生西天不入三塗

法華持驗隋終南山悟真寺釋法誠雍州樊氏止藍田王效寺專誦法華負笈歷遊名嶽法華三昧矢心奉行夢感普賢勸書大乘乃命工書八部般若又造華嚴堂竭其精志書寫受持時弘文學士張靜夙善翰墨請至山舍含香纔寫終部時感異鳥飛至經案自然馴擾貞觀初手寫法華正當露

地因事他去未收值洪雨滂注趨往觀之合案並乾餘便流潦

隋釋法泰眉州隆山人常誦法

華手寫經一部數有靈瑞向益州裝演俄墮筌橋水中求之不得師悲泣巡岸上下忽望小洲上有一襖命取之乃經也草木擎之宛無濕處師不勝歡喜卽至成都裝竟以檀香爲軸備極莊嚴還供本寺每夜異香滿室師勤持誦夜必一遍時有彪法師在彼寺講經夕至師誦經所見有諸人衆胡跪合掌彪流汗而退

宋高僧傳唐潤州攝山棲霞寺釋智聰嘗住揚州安樂寺大業之亂思歸無計隱江荻中誦法華經七日不食恆有虎遶之聰曰吾命須臾卿須可食虎忽發言曰造天立地無有此禮忽有一老翁榜舟而至翁曰師欲渡江至棲霞寺可卽上船四虎一時淚流聰曰爾與我有緣耶于是挾四虎利涉既達南岸船及老人不知所在聰領四虎往棲霞舍利塔西經行坐禪衆徒八十咸不出院若有所事一虎入寺鳴號以爲恆式聰至貞觀中遷化年九十九矣

法苑珠林唐曇韻禪師定州人隋末喪亂隱于離石北山常誦法華欲寫其經無人同志如此積年忽有書生來詣之乃以寫經爲請禪師大歡喜清旦食訖澡浴著淨衣入淨室受八戒口含旃檀燒

香懸幡寂然抄寫至暮方出明復如初曾不告倦及繕寫畢乃至裝褫一如正法書生告去送至門忽失所在禪師持誦曾無暫廢後遭胡賊倉卒逃避方箱盛其經置高岩上經年賊敗乃尋經於岩下獲之巾箱糜爛應手灰滅撥朽見經如舊鮮好

三寶感通錄益州新繁縣西四十里王李村隋時有書生姓荀氏善正書而不顯迹人莫能知之嘗于村東空中四面書金剛般若經擬諸天讀誦人初不之覺也後值雷雨牧牛小兒於書經處立而不沾濕其地乾燥可有丈餘及暗村人怪之爾後每雨小兒常集其中衣服不濕唐武德中有異僧語村人曰此地空中有金剛般若經諸天於上設寶蓋覆之不可輕犯自爾於四周設欄楯以阻人畜履踐每至齋日村人四遠就設佛供常聞天樂聲震沈寥繁會盈耳

法華持驗蔚州釋曇韻定州人少出家恆誦法華遍遊五臺備見靈相停北臺木瓜寺廿餘載禪誦無輟隋末喪亂年已七十隱比干山以夜繼晷攝心不怠常欲寫法華數年未辦積願既久忽有書生至云善寫經願成師志繇是掃室塗地含香默書出戒入沐未盈一旬七軸俱了將以獻施斯須不見後因胡寇卒至藏經巖窟經年寇靜覓經不獲乃於崖下草中得之箱襍俱爛卷色如初貞觀

十一年宣律師親覲其事

唐蘇州通元寺釋智琰吳郡朱氏年十二誦通法華後從秦皇寺延

法師進具德瓶儀鉢深護戒根武德七年返舊山常行法華金光明普賢等懺法誦法華三千餘遍
講涅槃法華各三十遍觀經百十遍苦節彌勤爐香不爇自焚醴水空自滿祥感非一

法苑珠林蘇長武德中爲巴州刺史赴任至嘉陵江風浪覆舟溺其家六十餘人唯一妾常讀法華
經水入船中妾頭戴經函誓與俱溺隨波泛濫頃之著岸逐經函而出開視其經了無濕污獨存其
命 唐武德中醴泉縣人徐善才常修齋戒誦觀音經逾千遍會往京城延興寺修營功德及還
家道逢胡賊賊所掠漢人千百將向洪崖次第殺之善才知不免唯至心念觀音經當殺之時了不
自覺至初夜方悟身在深澗樹枝上去岸三百餘尺以手摩頂覺微痛而無傷漸下樹循澗南行可
五六十里天漸曉去賊已遠得官路遂還家琬法師嘗說此事

冥報記唐李山龍馮翊人左監門校尉武德中暴亡而心不冷家人未忍殯殮至七日而甦自說云
當死時見被收錄至一官署甚廣大庭前有數千囚人枷鎖杻械皆北面立吏將山龍至庭廳上大
官坐高牀侍衛如王者尋呼山龍至階王問汝生平作何福業山龍對曰鄉人每設齋恆請施物助